



Atualizasaun Justisa

Períodu : Setembru 2013
Edisaun : 9 Setembru 2013

Julgamentu ba kazu krime korrupsaun hasoru eis Ministra Justisa Lúcia Lobato no kestaun kona-ba direitu ba prinsípiu julgamentu justu

Introdusaun

Korrupsaun nu'udar aktu kriminál ida ne'ebé grave teb-tebes tanba afeita interese públiku, prejudika dezvoltamentu nasionál no obstákulu ba dezvoltamentu sosiál no ekonómiku. Korrupsaun produz ema mukit barak tanba hamosu prejuizu ba orsamentu estadu nomós viola direitu sivíl no ekonómiku husi sidadaun tomak.

Tanba ne'e wainhira iha kazu korrupsaun ruma akontese sempre konvida reazem no debate naruk kona-ba asuntu ne'e, liu-liu kuandu kazu ne'e involve autóridade públiku sira ne'ebé lolos sai modelu ba nasaun.

Kazu interesante ida ne'ebé JSMP observa mak kazu ne'ebé involve eis Ministra Justisa iha Governasaun Aliansa Maioria Parlamentar nian. Tanba kazu ne'e nia natureza no ambitu interese públiku ne'ebé boot tebtibes', JSMP hanoin katak importante atu halo analiza klean relasiona ho kazu ne'e nia prosesu husi inisiu too nia konkluzau. Ne'e inklui atu hatur prosesu ne'e tuir nia dalan, halos persepsaun públiku kona-ba kazu ne'e, esforsu no movimentu husi advogadu sira no Ministériu Públiku no polemika kona-ba kestaun rekursu ordinariu no estra-ordinariu, "habeas corpus", kompozisaun panel iha tribunál rekursu no tribunál supremu no JSMP nia hanoin kona-ba kazu ne'e.

Kazu ne'e sai interesante no provoka debate públiku makas liu tan, wainhira iha alegasaun¹ hasoru membru Juis panel ne'ebé alegadu involve prátika abuzu poder iha desizaun providensia "habeas corpus" ne'ebé advogadu sira apresenta ba Tribunál Rekursu. Maske finalmente, alegasaun ne'e kontinua hela ho alegasaun no alegasaun kontra alegasaun no la iha medida adekuada atu investiga alegasaun ne'e nia fundamentu. Aleinde ne'e involvimentu defensoria públiku mós la ses husi debate no atensaun públiku tanba natureza prezensa defensoria públiku atu serve ema kbiit laek sira. Nune'e mós, esforsu husi ekipa advogadu sira atu utiliza meus legál

¹ Haree Komunikadu Imprensa JSMP: 8 Abril 2013-Advogadu Lúcia Lobato halo akuzasaun sériu ba mal-komportamentu hasoru juis sira iha Tribunál Rekursu

hotu ne'ebé eziste mós sai debate ketak ida ba públiku tanba movimentu no esforsu hanesan ne'e ladun akontese ba kazu sira ne'ebé involve komidade bai-bain sira.

JSMP hanoin katak kestaun sira ne'e iha ligasaun direta ho prinsiu julgamentu justu ne'ebé partensia obrigasaun tribunál no obrigasaun Timor Leste tur padraun internasionál sira atu kumpri iha kualker kazu ne'ebé lori ba tribunál atu hetan justisa.

Prosesu Julgamentu

Iha Abril 2012, Tribunál Distritál Dili hahu prosesu julgamentu ba kazu arguida Lucia Maria Brandão Freitas Lobato no António de Araújo Freitas nu'udar eis Xefi Departamentu Aprovizionamentu iha Ministériu Justisa.

Tribunál Distritál Dili nu'udar tribunál primeira instánsia konklui prosesu ne'e no kondena arguida Lucia Maria Brandão Freitas Lobato ho pena prizaun tinan 5 no absolve arguidu António de Araújo husi krime ne'ebé akuza ba nia.

Hafoin rona tiha akordaun tribunál primeria instánsia nian, parte sira tantu Ministériu Públiku no equipa advogadu apresenta rekursu ba Tribunál Rekursu. Depois avalia materia rekursu husi parte sira, Tribunál Rekursu kontinua mantein desizaun tribunál primeira instánsia no kondena arguida ba tinan 5 prizaun. Aleinde ne'e, Tribunál Rekursu mós kondena arguidu António Freitas de Araújo ba tinan 5 prizaun no selu indeminizasaun sivíl hamutuk US\$ 52,250.00.

Defeza kontinua la satisfas ho akordaun ne'e no apresenta rekursu extraordináriu ba iha Tribunál Supremu ne'ebé jere husi Tribunál Rekursu. Aleinde ne'e, defeza mós hato'o providensia "*Habeas Corpus*" relaciona ho mandatu detensaun ba arguida maske ikus-mai Tribunál Supremu rezeita.

Defeza kontinua halo esforsu oi-oin inklui deskobre no alega katak iha erru no indikasaun mal komportamentu ka abuzu podér ne'ebé involve membru husi panel ne'ebé halo desizaun iha prosesu ne'ebé advogadu hato'o ba tribunál rekursu. Faktu sira ne'e apresenta ba públiku liu husi konferensia imprensa.

Matéria akuzasaun Ministériu Públiku

Iha akuzasaun dahuluk ne'ebé julga ho Númeru Prosesu 580/C.Ord/2011/TDD), Ministériu Públiku akuza katak arguida ho kapasidade hanesan Ministra Justisa hamutuk ho nia kaben Americo Lopes inklui arguidu António Freitas nu'udar Prezidente Juri konkursu halo konluiu (*kolusi*) hodi afavor kompañia WASUPA sai vensedor iha konkursu ba fornimentu farda prizoneirus sira sein koñesimentu husi ekipa juri seluk. Arguidu mós halo falsifikasaun ba asinatura husi membru Ekipa Juri hodi favorese kompañia WASUPA.

Akuzasaun segundu ne'ebé julga ho Númeru Prosesu 622/C.Ord/2011/TDD, akuza katak arguida no arguidu halo kolusaun hodi hili kompañia Zorro Construction Lda sai vensedor ba konkursu

harii edifísiu Konservatóriu Rejistu Sivíl iha Distritu Lautem tanba Diretór kompañia ne'e iha ligasaun di'ak ho lider husi Partidu Sosiál Demokrata (PSD). Mesmu iha konkorsu ne'e ekipa juri la rekomenda Zorro Construction Lda hanesan vensedor.

Arguida mós hili kompañia sira seluk iha Distritu Aileu no Manufahe mezmú kompañia sira ne'e ható'o proposta sira ne'ebé la representa valór orsamentu ne'ebé di'ak. Avaliasaun ne'ebé hala'o husi kompañia *Architecture Civil Engineering Consultant Lda-ARCVIL* ne'ebé nomea husi Obras Públiku iha tinan 2007 no utiliza hanesan referénsia apresenta valór kada edifísiu sei hetan kusta másimu US \$167,502.

Ministériu Públiku mós akuza katak arguida hanesan Ministra Justisa decide atu atribui orsamentu US\$200,000 ba kada edifísiu (Manatuto, Lospalos, Oecusse, Ermera, Aileu, Covalima, Baucau, no Same) sein konsultasaun/konsellu husi diresaun relevantes no ignora tiha estudu tékniku sira, laiha kualkér prosedimentu ruma, no laiha kualkér fundamentasaun ne'ebé válidu. Asaun ne'e viola regra sira kona-ba aprovizionamentu governu nian. Hahalok hirak ne'e prejudika orsamentu estadu hamutuk US \$67,745.00

Bazeia aktu hirak ne'e, Ministériu Públiku akuza arguida Lúcia Lobato kontra artigu 274 Kódigu Penál (KP) kona-ba krime administrasaun danoza konjuga ho artigu 301 KP kona-ba agravaasaun, kontra artigu 297 KP kona-ba abuzu poder konjuga 301 KP kona-ba agravaasaun, no artigu 299 KP kona-ba partisipasaun ekonómika.

Entertantu Ministériu Públiku akuza arguidu António Freitas ho krime abuzu poder no falsifikasaun dokumentu tuir 263 Kódigu Penál Indonézia (KPI), (aktualmente artigu 304 KP Timor-Leste nian) no administrasaun danoza tuir artigu 274 Kódigu Penál Timor-Leste.

Notifikasaun ba julgamentu

Tribunál notifika arguida no arguidu atu atende julgamentu iha 14 Marsu 2012 maibé tribunál la kongege hala'ó julgamentu tanba Parlamentu Nasionál falla atu hasai imunidade husi Ministra Justisa. Iha 20 Marsu 2012 Parlamentu Nasionál pasa Rezolusaun Nú. 87/II tuir artigu 113(1) Konstituisaun hodi definitivamente hasai imunidade Minístra Justisa nian.²

Julgamentu halao konsekutivamente husi 24–27 Abríl 2012, kontinua iha 23–25 Maiu, 28 Maiu no iha 30 Maiu 2012 tama ba faze alegasaun finál. Durante loron 9 Tribunál rona depoimentu husi testemuña na'in 27.

² JSMP relatóriu temátiku, 'Priviléjju no Imunidade Parlamentár: Oinsá atu asegura igualdade iha lei nia oin?' (Juñu 2012): <www.jsmp.tl>

Iha prosesu produzaun ba prova, testemuña José Belo, nu'udar jornalista iha Tempo Semanal, hili direitu atu nonook tuir artigu 126 Kódigu Prosesu Penál (KPP).³

Tuir mai, testamuña sira seluk ho kapasidade nu'udar na'in ba kompañia no balun seluk nu'udar funsionáriu iha Ministériu Justisa no membru Ekipa Juri ba avaliasaun konkursu.

Durante julgamentu arguida Lucia Maria Brandão Freitas Lobato no arguidu António de Araújo Freitas deklara katak sira la hala'o servisu direktamente hanesan servisu lojística ne'ebé tau matan ka haree direktamente ba fardamentu, montante, nomós ekipamentu ba edifísiu hirak ne'e.

Arguida Lúcia Lobato deklara katak nia asina deit dokumentu ne'ebé nomeia kompañia sira bazeia ba rekomendasaun ne'ebé arguidu hanesan Prezidente Juri hato'ó ba nia. Aleinde ne'e, arguida deklara katak nia hili kompañia ne'ebé husu orsamentu boot tanba nia tane aas liu qualidade.

Iha parte seluk, arguidu António Freitas deklara katak nia apresenta kompañia sira ne'e tanba kompañia hirak ne'e prienxe kritériu atu sai vensedór iha konkursu ne'e.

Iha 30 Maiu 2012, Ministériu Públiku hato'o alegasaun finál ba tribunal. Iha alegasaan finál, Ministériu Públiku kontinua mantein nia akuzasaun no husu ba tribunál atu kondena arguida Lúcia Lobato ba tinan 12 iha prizaun no arguidu António Freitas ba tinan 9 iha prizaun.

Ministériu Públiku mós husu ba tribunál atu kondena arguidu no arguida selu indemnizasaun ba estadu ho valór US \$67,745 bazeia ba iha artigu 72 (1 to'o 4) husi KPP no artigu 103 no 104 husi KP.

Desizaun Tribunál Primeíra Instánsia

Iha 8 Juñu 2012 Tribunál Distritál Dili hatuun akordaun ba arguida Lúcia Lobato no arguidu António Freitas. Iha akordaun ne'e, arguida Lúcia Lobato hetan kondensasaun ba tinan 5 iha prizaun ba úniku krime partisipasaun ekonómika, selu indemnizasaun hamutuk US \$4,350 (fahe ba rua ho arguidu António Freitas de Araújo), selu kusta judisiál US\$ 300 no absolve krime sira seluk (administrasaun danoza no abuzu poder). Enkuantu, arguidu António Freitas hetan absolvisaan ba krime hotu maibé kondena selu indemnizasaun US \$4,350 ne'ebé fahe ba rua ho arguida Lúcia Lobato.

Rekursu Ordináriu

Iha 17 Jullu 2012, Ministériu Públiku no defeza hato'o rekursu ba Tribunál Rekursu depois sira simu dezisaun eskrita. Maisumenuz liu tiha fulan lima, iha 12 Dezembru 2012, Tribunál Rekursu

³ Artigu 126.1 Kódigu Prosesu Penál prevee kona-ba "Segredu Profesionál";...relijaun ka konfisaun relijioza nia ministru, advogadu, médiku, jornalista, instituisaun-de-kréditu nia membru ka ema ne'ebé lei permite ka obriga rai segredu iha direitu atu la kohi fó depoimentu kona-ba faktu ne'ebé tama iha segredu.

hatún dezisaun rekursu ne'ebé parte sira hato'ó ba Tribunál Rekursu. Tribunál Rekursu hanesan tribunál segunda instánsia kontinua mantein desizaun tribunál primeíra instánsia nian ba arguidu Lucia Lobato.

Entertantu arguidu António Freitas ne'ebé antes ne'e absolvidu, Tribunál Rekursu kondena ho pena prizaun tinan 5 tanba provadu komete krime administrasaun danoza relasiona ho konkursu ba edifísiu iha distritu 8 no seluk indemnizasaun ketak ho montante US \$50,000.00 (inklui ho indemnizasaun ne'ebé tribunál primeíra instánsia kondena).

Hafoin rona tiha akordaun Tribunál Rekursu nian, Ministériu Públiku imediatamente husu ba tribunál atu detein arguida hodi asegura katak arguida la halai ba estranjeiru. Iha 28 Dezembru 2012, polísia kaptura arguida (kondenada) Lúcia Lobato no hatama ba sela polísia Kaikoli. Iha 29 Dezembru 2012, Tribunál Distritál Dili hala'ó audiénsia hodi decide kona-ba pedidu husi Minitériu Públiku nian.

Ikus-mai tribunál decide, aplika TIR (*Termos Identidade da Residência*) tuir artigu 186 KPP, inklui prende pasaporte no informa ba parte imigrasaun atu kansela pasaporte no impede kuakler viajen ba rai liur.

Rekursu Estraordináriu

Iha 13 Dezembru 2012, defeza hato'ó 'rekursu interpostu'⁴ hodi informa ba Tribunál Rekursu katak defeza sei halo rekursu estraordináriu hasoru akordaun Tribunál Rekursu. Tuir lei prosesuál, rekursu estraordináriu iha tipu rua mak hanesan halo revizaun no atu fiksa jurisprudénsia (artigu 314 KPP).

Iha rekursu interpostu ne'e, defeza notifika Tribunál Supremu katak sira sei hato'ó revizaun ba akordaun Tribunál Rekursu bazeia ba artigu 315 KPP (revizaun nia fundamentu ho admisibilidade). Maibé iha 14 Dezembru 2012, Tribunál Rekursu hasai despaxu ida hodi resposta kedas katak defeza laiha fundamentu forti atu halo rekursu estraordináriu mezmu Tribunál Rekursu seidak simu substánsia no fundamentu husi alegasaun ba rekursu estraordináriu ne'e.

Iha 16 Janeiru 2013, depois feriádu judisiál, defeza hato'ó rekursu estraordináriu ba Tribunál Rekursu ne'ebé mós funsiona hanesan Tribunál Supremu. Iha 18 Janeiru 2013, Tribunál Supremu hatún akordaun hodi rejeita rekursu estraordináriu husi defeza ho konsiderasaun katak defeza la konsege hato'ó fundamentu ba revizaun tuir rekejitus husi artigu 315 KPP.

⁴ 'Rekursu interpostu' – hato'ó koñesementu ba Tribunál Rekursu katak parte defeza sei halo rekursu estraordináriu.

Depois simu akordaun ne'e, defeza hato'o kedas objesaun ho argumentu katak desizaun ne'e nulu tuir artigu 103.3(a) KPP kona-ba nulidade insanavel tanba kompozisaun juis prosesu ne'e hanesan, tantu iha rekursu ordináriu no iha rekursu estraordináriu.

Iha rekerementu ne'e, defeza husu atu nomeia juis foun iha Tribunál Supremu tanba juis ne'ebé decide dezisaun iha rekursu ordináriu mak tur hanesan panel hodi halo akordaun mós iha Tribunál Supremu.

Análiza no JSMP nia pontu-de-vista

JSMP observa katak iha Kódigu Prosesu Penál Timor Leste (KPP) la define klaru kona-ba kompozisaun juis iha nivél rekursu ordináriu rekursu estraordináriu. Maibé JSMP hanoin katak kompozisaun juis ne'ebé hanesan iha rekursu ordináriu no rekursu estraordináriu bele prejudika prinsípiu tribunál ne'ebe justu no tribunál nia imparsiálide. Públiku bele iha persepsaun katak desizaun refere la neutru no la justu tanba desizaun rekursu estraordináriu mai husi juis hanesan.

JSMP dúvida katak kompozisaun juis hanesan bele halo korresaun ne'ebé neutru ba ninia desizaun rasik. JSMP mós hanoin katak kompozisaun juis hanesan ba nivél tribunál diferente defisil tebe-tebes atu evita konfliktu ba interese iha kazu ne'ebé sira decide. Pergunta no dúvida sira ne'e bele observa atraves husi prosesu ne'ebé lao. Purzemplu JSMP nota Tribunál Rekursu presiza deit loron rua hodi halo desizaun ba materia rekursu estraordináriu husi advogadu sira.

Iha Kódigu Prosesu Penál Indonézia (KPPI), eziste artigu 2 ne'ebé defini klaru kona-ba kompozisaun juis tantu iha rekursu ordinariu no rekursu estraordináriu. Iha Artigu 239 (3) haktuir katak se juis ne'ebé foti desizaun ba kazu ida iha tribunál primeíra instánsia no depois hetan nomeasaun nu'udar juis iha Tribunál Rekursu, juis refere bandu ka la permite atu kaer kazu ne'ebé hanesan iha rekursu.

Nune'e mós artigu 251(3) haktuir katak se juis ida kaer ona kazu iha tribunál primeíra instánsia ka iha tribunál rekursu, no depois hetan nomeiasaun nu'udar juis ka ofisiál justisa iha Tribunál Supremu, juis ne'e la bele hala'o funsaun hanesan juis ka ofisiál justisa iha rekursu estraordináriu ba kazu ne'ebé hanesan.

JSMP observa katak KPPI define klaru liu duke Kódigu Prosesu Penál Timor-Leste relasiona ho kestaun kompozisaun juis iha situaun hanesan iha kazu ne'e.

Tuir JSMP nia hanoin maske iha KPP Timor-Leste nian la defini klaru kona-ba provizaun kompozisaun ba panel sira iha rekursu nian, idealmente Juis sira tenke konseinte katak iha impedimentu atu tur fali iha panel hanesan ba kazu hanesan. Ne'e prátika normal ne'ebé hanessan Juis sira tenke voluntariamente apresenta impedimentu bainhira sira hetan nomeasaun atu sai membru panel ba kazu hanesan ne'ebé antes ne'e sira involve ona.

Ezemplu seluk, Juis sira ne'ebé tur iha nivél tribunál hanesan (tribunál ditritál no rekursu) la iha kbi'it tuir lei atu kurize Juis seluk nia desizaun, inklui Juis administradór nu'udar superior iha Tribunál Distritál sira. Tanba ne'e, irarkia tribunál sira hari'i no funsiona atu kurize desizaun sira ne'ebé mai husi tribunál nivél kraik sira.

Mezmu defeza apresenta objesaun kona-ba nulidade ne'e, ezekeusaun pena la'o nafatin. Ezekeusaun pena hala'o husi Tribunál Distritál Dili tuir artigu 326 KPP (kompetensia ba ezekeusaun). Nune'e, Tribunál Distritál Dili haruka lori kondenada Lúcia Lobato ba prizaun Gleno iha 22 Janeiro 2013, no kondenadu António Freitas de Araújo hatama ba prizaun iha 23 Janeiro 2013.

Prosesu Habeas Corpus

Iha 22 Janeiro 2013, ekipa defeza ba kondenada Lúcia Lobato hatama aplikasaun ba Tribunál Rekursu ne'ebé funsiona mós hanesan Tribunál Supremu iha Timor Leste atu apresenta providensia *habeas corpus* tuir artigu 205 KPP, tanba konsidera katak mandatu detensaun ba sira nia kliente ne'e ilegál.

Iha 30 Janeiro 2013, juis kolektivu ne'ebé kompostu husi Prezidente Tribunál Rekursu, Dr. Claudio de Jesus Ximenes, Dr. Jose Luis da Goia, no Dra. Maria Natercia Gusmão Pereira hatún desizaun ba aplikasaun *habeas corpus* ne'e. Desizaun ne'e rejeita pedidu *habeas corpus* husi rekerente kondenada sein selu kustus judisiál.

Iha desizaun ne'e, hamosu pro-kontra ka votu vensidu husi Prezidente Tribunál Rekursu, Dr. Cláudio Ximenes relasiona ho providénsia *habeas corpus*. Prezidente Tribunál Rekursu konsidera katak kondenada seidak bele halo detensaun tanba rekursu estraordináriu sei lao hela no signifika katak dezisaun tribunál rekursu seidak vale hanesan desizaun ne'ebé tama iha faze tranzitu en julgadu. Maibé juis na'in rua seluk konsidera katak detensaun ne'e legál no vota kontra *habeas corpus*. Ho akordaun ne'e, kondenada Lúcia Lobato continua kumpri nia sentensa iha prizaun.

Alegasaun ba indikasaun mal-komportanmentu juis panel

Iha 15 Abril 2013 ekipa advogadu ne'ebé reprezenta husi Dr. José Camões konvoka mídia tantu jornal no eletronika halibur iha Ótel Timor hodi halo konferensia imprensa ne'ebé alega katak membru Juisa ida iha Tribunál Rekursu no membru Parlamentu Nasionál ida halo influencia ba iha desizaun kazu ida ne'e iha nivél rekursu.

Hafoin konferensai imprensa provoka tan debate naruk tanba membru parlamentu no Prezidente Tribunál Rekursu hahu halo alegasaun ba malu relasiona kazu ne'e. Mesmu ne'e, la iha prosesu no medida adekuada atu investiga alegasaun hirak ne'e. JSMP bolu ona atensaun atu hari'i ekipa

independente ida ne'ebé kompostu husi tribunál, Ministériu Públiku no instituisaun independente sira atu investiga alegasaun ne'e no lori prosesu ne'e ba tribunál atu decide, maibé la iha rezultadu too ohin loron.

JSMP hanoin katak alegasaun hasoru kompartamentu Juis sira nu'udar alegasaun ne'ebé sériu teb-tebes. Tanba ne'e JSMP hanoin katak importante teb-tebes atu hari'i ekipa investigasaun indepedente ida hodi buka tuir faktu sira husi alegasaun ne'e. Ne'e importante atu la hamenus konfiansa públiku ba instituisaun judisiáriu ne'ebé sei iha faze konstrusaun nia laran hela.

Observasaun no rekomendasaun ba futuro

JSMP observa katak prosesu julgamentu husi inísiu to'o iha faze tranzitu julgadu la'o ho esforsu maximu husi parte sira. Ne'e inklui esforsu ne'ebé parte sira halo atu utiliza meus legál hotu ne'ebé disponível hodi defende no salva interese legítimu husi kazu ne'e. Mesmu nune'e, JSMP mós deskobre katak iha erru balun eziste no hamosu potencia atu prejudika interese lejítimu husi kazu ne'e no en-jerál prejudika sistema judiásiriu ne'ebé sei iha faze konstrusaun nia laran.

Kona-ba kompozisaun panel

Tuir JSMP nia hanoin, mezmu KPP-TL la defini klaru kona-ba kompozisaun panel, maibé kompozisaun ne'e hamosu dúvida signifíkativu teb-tebes ba públiku relasiona imparcialidade no objetividade tribunál nian no liu-liu prinsípiu julgamentu justu ne'ebé durante ne'e kesi metin tribunál nia servisu.

Iha artigu 39 no 40 KPP ne'ebé defini kona-ba motivu impedimentu no suspeisaun, tuir lolos sufiesente atu Juis sira deklara impedimentu wainhira simu nomeasaun ba membru panel ba kazu hanesan.

JSMP konvensidu katak imposivel ba juis ida atu halo koresaun ne'ebé nuetru ba nia desizaun rasik. JSMP mós sente estrañu wainhira TR prezisa deit loron 2 hodi konklui dezisaun ba rekursu estraordináriu husi parte defeza.

JSMP hanoin katak kompozisaun panel ba rekursu ordinariu no rekursu estraordinariu nu'udar problema sériu atu asegura desizaun ida nia kualidade no iha potencia prejudika prinsípiu julgamentu justu ne'e rasik.

JSMP konkorda katak kuakler individu ne'ebé aktu krime ruma, tenke simu responsabilidade tuir nivél gravidade husi kazu ne'e. Maibé JSMP mós enkoraza autór tribunál sira atu asegura katak prosesu hotu-hotu lao tuir prinsípiu sira kona-ba prátika diak ne'ebé eziste ona.

Estatutu sosiál kondenada no papel defensoria públiku

Ho estatutu sosial nu'udar eis-Ministra Justisa, kondenada Lúcia Lobato iha opsaun finansieriu sufisiente atu la hetan asisténsia legál husi Defensór Públiku.

JSMP hanoïn katak embora hanesan arguida iha direito lejítimu atu nomea nia advogadu tuir nia konsensia bazeia ba méritu no kualifikasaun husi advogadu sira, maibé JSMP hanoïn katak Defensór Públiku institucionalmente tenke konsiente katak sira iha impedimentu tuir artigu 6 Dekretu Lei Governu Nú. 38/2008 kona-ba Estatutu husi Defensoria Públiku nian.

Esforsu no movimentu advogadu sira

JSMP haksolok teb-tebes atu hare advogadu sira halo esforsu hotu-hotu atu utiliza meus no rekursu legál ne'ebé disponível atu defende interese lejítimu husi sira nia kliente. Ne'e pasu ida ne'e progresu teb-tebes no representa servisu ideal hanesan advogadu profisionál. JSMP konkorda katak kualker individu ruma ne'ebé hetan alegasaun ba krime saida deit iha direito absoluta atu hetan representasaun legál husi advogadu ne'ebé kualifikadu. Tanba ne'e partensia ba direito ba julgamentu ne'eb'e justu no representasaun legál ne'ebé ho qualidade.

Infelizmente, JSMP mós rejista katak esforsu no movimentu hanesan la-dun akontese iha kazu sira ne'ebé involve ema kiik sira. JSMP dala-barak simu keisa no lamentasaun husi comunidade sira katak advogadu sira la iha komunikaun diak ho sira, la diskuti sira nia kazu ho profunda antes lori ba tribunál no la esplika opsaun no risku saida deit mak sei akontese iha sira nia kazu.

JSMP hein katak iha futuru esforsu no movimentu hanesan ne'e bele eziste mós ba comunidade baibain sira, halo representasaun ida ne'e ho qualidade no asegura katak prosesu hot-hotu tenke representa interese kliente ne'ebé advogadu sira representa.

Rekomendasaun

- Husu ba Tribunál Rekursu hanesan Tribunál Supremu atu halo interpretasaun no fixa jurisprudénsia ba provizasaun prosesuál sira ne'ebé la klaru, ne'e inklui kompozisaun panel iha prosesu rekursu.
- Husu ba Ministériu Justisa atu hari'i no funsiona Tribunál Supremu Justisa atu evita konfuzasaun hanesan iha futuru, liu-liu atu proteze direito lejítimu sidadaun hot-hotu nia direito ba julgamentu ne'ebé justu.
- Atu evita konfuzasaun no dúvida ba públiku no liu-liu atu salva independensia no krebilidade tribunál sira nia funsaun iha futuru, husu atu Juis ka Ministériu Públiku sira atu iha korazem hodi deklarar impedimentu kuandu konsiente katak sira nia involvimentu bele prejudika rezultadu final husi kazu ne'e.
- Husu ba defensoria públiku maneija sira niaan hodi asegura katak interese justisa ba ema kbi'it laek sira hatur iha prioridade no esforsu ne'ebé sira halo atu aplika mós ba kazu sira ne'ebé involve povu bai-bain sira.

- Husu ba autóridade kompotente sira atu respeitu kualker dezisaun tribunál nian, tanba dezisaun tribunál nian soi kbi'it aas liu dezisaun estadu sira seluk;

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPTl